

Naziv: Agencija ONASA
Naziv: KONFERENCIJA O USPOSTAVLJANJU AKADEMSKE I ISTRAŽIVAČKE MREŽE U BIH
Datum: 20.10.

SARAJEVO: KONFERENCIJA O USPOSTAVLJANJU AKADEMSKE I ISTRAŽIVAČKE MREŽE U BIH

U Sarajevu je danas, u organizaciji Trans-evropskog udruženja akademskih i istraživačkih mreža (TERENA), počeo sastanak čiji učesnici će razgovarati o revitalizaciji akademske i istraživačke mreže u BiH

SARAJEVO, 20. NOVEMBRA (ONASA) - U Sarajevu je danas, u organizaciji Trans-evropskog udruženja akademskih i istraživačkih mreža (TERENA), počeo sastanak čiji učesnici će razgovarati o revitalizaciji akademske i istraživačke mreže u BiH.

Trenutno u BiH ne postoji operativna organizacija za cijelu državu koja koordinira internet i druge komunikacijske infrastrukture, kao i usluge za domaće naučne i obrazovne sektore, tako da će sudionici skupa raspravljati o ovom pitanju, kao i o potrebnim aktivnostima da bi se ponovo uspostavila nacionalna akademska i istraživačka mreža (NREN) u BiH.

U radu skupa učestvuju predstavnici domaćih univerziteta, ministarstava, organizacija i telekom operatera, te zvaničnici Evropske komisije (EC) i Izvršnog odbora GÉANT2 - Pan-evropske akademske i istraživačke temeljne mreže, koja uvezuje nacionalne akademske i istraživačke mreže.

"Elektrotehnički fakultet, i mimo ovog projekta, pokušava da ubijedi odgovorne ljude i institucije da je uspostavljanje ove mreže neophodno za akademsku zajednicu. Odziv je gotovo nikakav...Tek u zadnjih nekoliko mjeseci počinju da se uključuju 'BH Telecom', 'Telekom Srpske' i još neki ljudi koji, čini mi se, počinju da razumijevaju i pomažu, ali na neki neorganiziran način", kazao je profesor sarajevskog Elektrotehničkog fakulteta Novica Nosović.

Prema njegovim riječima, krajnje je vrijeme da se u BiH pokrenu aktivnosti revitalizacije akademske i istraživačke mreže, te da se u prvoj fazi, brzom računarskom mrežom uvežu barem glavni bh. univerziteti, što bi omogućilo njihovu međusobnu saradnju i povezivanje na evropsku mrežu.

TERENA je u septembru 2004. godine pokrenula projekat GÉANT2, odnosno program podrške razvoju nacionalnih akademskih i istraživačkih mreža, s ciljem prevazilaženja postojećih razlika između razvijenih zemalja i zemalja u kojima su usluge računarskog umrežavanja dostupne istraživačima, profesorima i studentima na nezadovoljavajućem nivou.

Predstavnik TERENA-e Valentino Kavali (Cavalli) izjavio je da danas mnoge zemlje nisu u mogućnosti pripadnicima akademske zajednice omogućiti rad, učenje i saradnju na istom nivou koji imaju njihove kolege unutar drugih mreža u Evropi, a kao razlog postojećih razlika naveo je korištenje usluga baziranih na zastarjelim tehnologijama.

Uloga TERENA-e ogleda se, između ostalog, u pružanju tehničke pomoći pojedinim zemljama u procesu obuke zaposlenih i rukovodilaca u organizacijama zaduženim za pružanje mrežnih usluga akademskoj zajednici, te u razmjeni stručnjaka između naprednih i manje naprednih nacionalnih mreža.

Prije šest mjeseci TERENA je obavila procjenu stanja i potreba u pojedinim evropskim zemljama, kada je utvrđeno da u BiH postoji određena organizacija za pružanje mrežnih usluga akademskoj zajednici, ali da ona nije funkcionalna, zbog čega je potrebno pristupiti njenoj revitalizaciji i unapređenju, s ciljem omogućavanja boljih uslova za rad i obrazovanje profesora, istraživača i studenata. (kraj)